



***Komunikadu Imprensa
Parlamentu Nasionál
5 Feveiru 2015***

Parlamentu Nasionál adia kuaze fulan ida ona diskusaun kona-ba ratifikasaun ba nomeasaun Prezidente Supremu Tribunál Justisa, provizoriamente Tribunál Rekursu

Hahú hosi inísiu Feveiru 2015, Plenaria Parlamentu Nasionál agenda ratifikasaun ho eskrutíniu sekretu ba nomeasaun Prezidente Supremu Tribunál Justisa (PSTJ), ne'ebé provizoriamente enkarega ba Prezidente Tribunál Rekursu (PTR) ne'ebé efetua liuhosi Dekretu Prezidente Repúblika (DPR) Nú. 11/2014, 28 Feveiru. Diskusaun no ratifikasaun ne'e adia hela de'it tanba kestaun interpretasaun legál ne'ebé diferente entre Bankada Parlamentár sira.

Bankada Parlamentár Fretilin no PD konsidera la nesesáriu ona atu halo ratifikasaun ba nomeasaun ne'e tanba PTR hala'o nia knaar besik tinan ida ona no Konsituisaun no Lei kona-ba Estatutu Majistratura Judisiál prevee ratifikasaun só ba de'it PSTJ, la'ós ba PTR. Ne'eduni bankada sira ne'e husu PN la bele repete fali sala ne'ebé halo ona iha 2011.

Enkuantu Bankada CNRT kontinua ezije ratifikasaun ho razaun katak ho ratifikasaun ne'e, PSTJ, provizoriamente PTR bele hetan lejitimidade no forsa polítika hosi PN hodi ezerse nia funsaun sira.

“Tuir JSMP nia hanoin, la iha enkuadramentu legál ida ne'ebé obriga atu PN halo ratifikasaun ba nomeasaun PTR no la iha ratifikasaun mós sei la fó impaktu ba servisu PTR nian bainhira hala'o knaar STJ nian tanba kompeténsia ne'e Konstituisaun no lei mak fó. Konstituisaun no lei ne'e mai hosi PN, ne'e lejitimu no iha ona forsa polítika no legál atu ezerse,” dehan Diretór Ezekutivu JSMP, Luis de Oliveira Sampaio.

Iha 2011, Parlamentu Nasionál (PN) hasai Rezolusaun Parlamentár (RP) Nú. 21/2011 hodi ratifika nomeasaun PTR ne'ebé efetua ho DPR Nú. 43/2011, 10 Juñu.

Iha DPR rua ne'e, la temi nomeasaun ba PSTJ, maibé nomeasaun ba PTR. Bazeia ba alineaia 1 Art. 29 Lei Nú. 8/2002 ne'ebé altera ho Lei Nú. 11/2004, nafatin iha alineaia 1 Art. 29 hateten katak Prezidente Repúblika mak nomeia PSTJ entre juís sira Supremu Tribunál nian ba mandatu tinan 4 ne'ebé nomeasaun ne'e sujeita ba ratifikasaun PN. Kompeténsia PN hodi ratifika nomeasaun PSTJ ne'e prevee iha alineaia a) nú. 3 Art. 95 Konstituisaun. Tuir alineaia 4 Art. 110 Lei Nú. 11/2004, nomeiasaun ba PTR la sujeita ba ratifikasaun PN maske alineaia 1 Art. 164

Konstituisaun no alinea 1 Art. 110 Lei Nú. 11/2004 fó kbiit ba TR hodi hala'o knaar sira STJ nian.

Atu hetan informasaun kle'an favór kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Landline: 3323883 / 77810637